



INTERVENCIÓN XERAL E XESTIÓN ECONÓMICO-FINANCEIRA

EXPEDIENTE SUBTEL: 2025000027061

ASUNTO: INFORME DEFINITIVO DE AUDITORÍA FINANCEIRA SOBRE AS CONTAS ANUAIS DO 2024 DO CONSORCIO PROVINCIAL CONTRA INCENDIOS E SALVAMENTO.

DESTINATARIOS:

PRESIDENCIA E PLENO DO CONSORCIO.

PLENO DA DEPUTACIÓN PROVINCIAL.

CONSELLO DE CONTAS DE GALICIA.

TRIBUNAL DE CUENTAS.

I. INTRODUCCIÓN.¹

O órgano interventor da Deputación Provincial, no exercicio das competencias que lle confiren os artigos 213 e seguintes do Texto refundido da Lei reguladora das Facendas locais e dándolle cumprimento ao disposto no artigo 29.3. A), apartado d), do Regulamento de réxime xurídico do control interno das entidades que conforman o sector público local (RD 424/2017, do 28 de abril), na execución do Plan de control interno 2024, levou a cabo a auditoría das Contas anuais do **CONSORCIO PROVINCIAL CONTRA INCENDIOS E SALVAMENTO DA CORUÑA (V15859481) correspondentes ao exercicio 2024**, que comprenden o Balance de Situación a 31 de decembro de 2024, a Conta do resultado económico-patrimonial, o Estado de cambios do patrimonio neto, o Estado de fluxos de efectivo, a Memoria e, asemade, a Liquidación do Orzamento do Exercicio 2024.

¹ Na presentación e orde de contidos deste informe tomamos en consideración a totalidade das NIA-ES SP aprobadas pola Resolución da Intervención xeral do Estado de 25 de outubro de 2019, seguindo a estrutura fixada pola Nota técnica 1/2020 da Oficina Nacional de Auditoría da IGAE. Asemade, no tocante á redacción, procurouse realizar en cada apartado unha exposición clara, obxectiva, ponderada e sistemática, tendo en conta a importancia cuantitativa e cualitativa da mesma, de conformidade coa Resolución da IGAE de 30 de xullo de 2015 de recomendacións para o exercicio da auditoría pública.



INTERVENCIÓN XERAL E XESTIÓN ECONÓMICO-FINANXEIRA

II. OPINIÓN MODIFICADA.²

Na nosa opinión, **excepto polos efectos das cuestións descritas na sección de Fundamento de opinión con deficiencias do noso informe**, as contas anuais achegadas expresan, en todos os aspectos significativos, a imaxe fiel do patrimonio e da situación financeira da entidade a 31 de decembro de 2024, así coma os seus resultados e fluxos de efectivo correspondentes ao exercicio rematado en dita data, de conformidade co marco normativo de información financeira que resulta de aplicación (que se recolle na Nota 2 da Memoria) e, en particular, cos principios e criterios contábeis e orzamentarios contidos no mesmo.

III. FUNDAMENTO DA OPINIÓN.

Tal como se adiantou no epígrafe anterior, emítase unha opinión modificada polas seguintes incorreccións que se teñen atopado na comprobación analítica e de contraste da información recibida que se ten realizado sobre os distintos estados que compoñen a Conta xeral, así como pola información obtida doutros documentos extracontábeis que teñen sido incorporados a esta auditoría.

1. **O importe dos dereitos recoñecidos no concepto 319.00 do Estado de ingresos (taxa pola prestación de servizos) non reflicte adecuadamente as devindicacións producidas segundo a Ordenanza fiscal nº 1.**

Segundo a información obtida na aplicación informática “*Abertool cms*” de xestión de intervencións dos bombeiros, no ano 2024 téñense realizado un total de 2.772 intervencións por parte dos efectivos dos dez parques de bombeiros.

² Na emisión da opinión e no seu fundamento seguimos a NIA-ES-SP 1705 R.



INTERVENCIÓN XERAL E XESTIÓN ECONÓMICO-FINANXEIRA

Estas intervencións materiais, logo de seren cualificadas xurídicamente, deberían ter dado lugar, na meirande parte dos casos, a práctica dunha liquidación tributaria pola taxa de prestación de servizos que está regulada na Ordenanza fiscal nº 1.

Ditas liquidacións, logo de seren aprobadas por Resolución da Presidencia, deberían reflectirse contablemente mediante o correspondente recoñecemento de dereito sobre o concepto 319.00 do Estado de ingresos, xerándose á par un cargo na conta 430.0 da contabilidade financeira da entidade.

Mais o retraso acumulado na actividade de xestión tributaria da entidade, tal como xa se indicou nos informes de auditoría emitidos con respecto ás contas anuais dos exercicios anteriores, evidencia que non se realizaron polo de agora as liquidacións correspondentes a estas posibles devindicacións do tributo. En concreto, durante o exercicio 2024 foron practicadas liquidacións tributarias correspondentes a intervencións realizadas nos exercicios 2021 e 2022.

Ben é certo que dende a data de devindicación, a administración dispón do prazo de catro anos para a práctica das liquidacións e, no momento que se produza estas, contabilizarase o recoñecemento de dereito no orzamento do correspondente exercicio; con todo, cómpre advertir de novo deste retraso temporal, de xeito que nun prazo razoable de tempo se poida lograr a plena sincronización entre a realización do feito imponible e a xeración da correspondente liquidación, evitando o risco dunha posible prescrición e mesmo acadar deste xeito unha maior eficacia recadatoria.



INTERVENCIÓN XERAL E XESTIÓN ECONÓMICO-FINANCEIRA

2. As diferenzas entre os dereitos pendentes de cobro rexistrados na Conta xeral e os valores xestionados polo Servizo de Recadación da Deputación.

Logo da comprobación analítica realizada sobre os dereitos pendentes de cobro do exercicio corrente 2024 e dos exercicios pechados, comparouse a información obtida coa solicitada ao Xefe do Servizo de Recadación da Deputación, pódose de manifesto as diferenzas obtidas no informe provisional.

Posteriormente, xa no período de alegacións, foi incorporado ao expediente un informe complementario emitido pola administrativa-contable e conformado polo Tesoureiro, no que finalmente se constatan as seguintes diferenzas, que superan amplamente a cifra de materialidade en execución (CIRET) establecida no Memorándum de planificación desta auditoría:

Exercicio	Aplicación	Dº pendentes de cobro 31.12.2024	Dº pendentes de cobro 31.12.2024 + 4ºT (Liquidación 2024)	Pendente de cobro GTT	Diferencia
2016	31900	476,00 €	476,00 €	0,00 €	476,00 €
2017		8.192,58 €	8.192,58 €	0,00 €	8.192,58 €
2018		22.073,17 €	22.073,17 €	7.243,30 €	14.829,87 €
2019		1.839,74 €	1.839,74 €	2.346,00 €	-506,00 €
2020		1.140,00 €	319,00 €	319,00 €	0,00 €
2021		24.121,25 €	23.562,66 €	36.051,33 €	-12.488,67 €
2022		20.712,60 €	20.022,33 €	22.024,92 €	-2.002,59 €
2023		81.430,97 €	63.500,61 €	54.115,40 €	9.385,21 €
2024		310.922,39 €	170.135,24 €	186.356,13 €	-16.220,89 €
TOTAL		470.908,68 €	310.121,33 €	308.456,08 €	1.665,51€

O importe dos dereitos pendentes de cobro resulta certamente relevante, pois ademais de afectar ao saldo das contas de Balance 430 e 431, o mesmo é considerado para o cálculo do Remanente de tesourería.



INTERVENCIÓN XERAL E XESTIÓN ECONÓMICO-FINANCEIRA

Para dar esta opinión modificada con deficiencias, temos executado a auditoría de conformidade coa normativa reguladora da actividade de auditoría de contas vixente no Sector Público en España (NIA-ES-SP, aprobadas por Resolución da Intervención xeral do Estado de 25 de outubro de 2019). As nosas responsabilidades de acordo con ditas normas descríbense máis adiante na sección *“Responsabilidades do auditor en relación coa auditoría das contas anuais”* do noso informe.

Somos independentes da entidade, de conformidade cos requirimentos de ética e de protección da independencia que son aplicables a nosa auditoría das contas anuais para o Sector público en España³, segundo o esixido pola normativa reguladora da actividade de auditoría de contas de dito Sector público.

Consideramos que a evidencia de auditoría que obtivemos proporciona unha base suficiente e adecuada para a nosa opinión modificada con deficiencias ou incorreccións materiais indicadas.

IV. CUESTIÓN CLAVE DE AUDITORÍA.

As cuestións clave de auditoría son aquelas que, segundo o noso xuízo profesional, teñen sido de maior importancia ou alcance na nosa auditoría de contas anuais do período actual. Estas cuestións teñen sido tratadas no contexto da nosa auditoría das contas anuais no seu conxunto, e na formación da nosa opinión sobre as mesmas, polo que non expresamos unha opinión por separado das mesmas.

³ A estes efectos, seguimos a Nota técnica 1/2018, da Oficina Nacional de Auditoría, tendo incorporado ao expediente un cuestionario debidamente cuberto polas dúas persoas que temos participado nos traballos.



INTERVENCIÓN XERAL E XESTIÓN ECONÓMICO-FINANCEIRA

V. PÁRRAFO DE ÉNFASE.⁴

Temos que chamar a atención sobre a escasa capacidade da entidade para xerar os seus propios recursos e a súa excesiva dependencia do financiamento ordinario que recibe das dúas administracións que a integran. Esta circunstancia únese nunha relación directa ao retraso acumulado na práctica des liquidacións tributarias polas intervencións realizadas en parte de 2023, 2023 e 2024.

Isto indica que as persoas e entidades beneficiarias do servizo son gravadas cunha taxa que resulta moi deficitaria con respecto ao custo do servizo, recaendo o importe restante no conxunto das persoas contribuíntes. Lémbrese a este respecto que, na meirande parte dos casos, a débeda tributaria é asumida polas compañías aseguradoras dos bens sinistrados, integrándose o gasto dentro das súas provisións para responsabilidades.

Por outra banda, segue a apreciarse a inacción administrativa da entidade para executar os créditos para investimentos, así como as dotacións consignadas despois das importantes modificacións de crédito que se realizaron ao longo do exercicio.

⁴ Nesta sección tomamos en consideración a NIA-ES-SP 1706.



INTERVENCIÓN XERAL E XESTIÓN ECONÓMICO-FINANCEIRA

OUTRAS CUESTIÓNS⁵.

Con data de 13 de setembro de 2021, esta Intervención emitiu un informe de auditoría sobre as contas anuais do exercicio 2021 (expediente 2021000029440), no que se expresou unha **opinión modificada desfavorábel**.

Logo dese informe, na sesión plenaria que tivo lugar o día 21 de outubro de 2021, á proposta do titular da Presidencia, aprobouse un Plan de acción para corrixir as eivas advertidas. A tal fin, con posterioridade, procedeuse a aprobar o inventario que xa estaba elaborado, contabilizando o valor dos activos segundo figura en dito inventario e procedendo a dotar o gasto por amortizacións correspondente. Tamén se procedeu a regularizar os saldos de maior importancia nos conceptos non orzamentarios.

Con todo, das medidas propostas naquel Plan de acción, están pendentes de aplicar efectivamente as seguintes:

- Plan anual de contratación: planificación da actividade contractual e impulso dos procedementos necesarios para que se cumpra cos principios propios da contratación pública, de publicidade, concorrência e non discriminación, garantindo asemade unha maior eficiencia económica.
- Novo impulso a xestión tributaria da taxa, ata á posta ao día nesta tarefa, de xeito que as liquidacións e practiquen de xeito inmediato ou no prazo máis breve posible dende que se produce cada intervención.

⁵ Aplicamos a NIA-ES-SP- 1706 R e seguimos as indicacións e redacción proposta do apartado G) da Nota Técnica ONA 1/2020.



INTERVENCIÓN XERAL E XESTIÓN ECONÓMICO-FINANCEIRA

- Adaptación dos estatutos do Consorcio á Lei 40/2015, de 1 de outubro, de Réxime xurídico do Sector público.

Para tal efecto, debería convocarse á maior brevidade a comisión de seguemento do Plan de acción, tal como está previsto no apartado undécimo daquel documento.

VI. OUTRA INFORMACIÓN.⁶

Este apartado do informe está referido á Memoria de custos e rendemento de servizos e á Memoria demostrativa do grao no que se cumpriron os obxectivos programados, documentos que se achegan como anexos á Conta xeral que se está a auditar, dándolle así cumprimento ás esixencias establecidas na lexislación de facendas locais.

Cómpre advertir que a nosa opinión de auditoría sobre as contas anuais non cubre a información extracontábel. A nosa responsabilidade sobre dita información que deriva da contabilidade, de conformidade co esixido pola normativa reguladora da actividade de auditoría de contas, consiste en avaliar e informar sobre a súa concordancia coas contas anuais, partindo do coñecemento da entidade que obtivemos na realización da auditoría e sen incluír información distinta da obtida como evidencia durante a mesma.

⁶ Aplicamos neste apartado o disposto na NIA-ES-SP-1720 R, responsabilidades do auditor con respecto a outra información.



INTERVENCIÓN XERAL E XESTIÓN ECONÓMICO-FINANCEIRA

Asemade, a nosa responsabilidade con respecto aos indicadores extracontábeis do Consorcio, como consecuencia do seu carácter de ente público adscrito á Deputación da Coruña, consiste en avaliar e informar respecto de seu contido é conforme coa normativa que resulta de aplicación. No caso de que, con fundamento no traballo realizado, concluímos que existen incorreccións, temos a obriga de poñelas de manifesto.

Sobre a base do traballo realizado, esta outra información extracontábel vese afectada en canto a súa concordancia e contido polas cuestións que se sinalan no apartado de fundamento de opinión con deficiencias, ao non reflectir as contas o importe correcto dos dereitos recoñecidos netos no tocante á taxa pola prestación de servizos do Consorcio.

VII. RESPONSABILIDADE DO CONTADANTE (TITULAR DA PRESIDENCIA) EN RELACIÓN ÁS CONTAS ANUAIS⁸.

De conformidade co disposto no artigo 14^o.19 dos Estatutos da entidade, a Presidencia é responsábel de formular as contas anuais que se achegan, de forma que expresen a imaxe fiel do patrimonio, da situación financeira e dos resultados da entidade, de conformidade co marco normativo de información financeira aplicable a un consorcio adscrito a unha entidade local en España⁷, e de control interno establecidas⁹ para permitir a preparación das contas anuais libres de incorrección material, debida a fraude ou a erro.

⁷ Capítulo VI do Título II da Lei 40/2015, do Réxime xurídico do Sector público e Texto refundido da Lei reguladora das Facendas locais aprobado por Real decreto legislativo 2/2004, de 5 de marzo, e Orde HAP/1781/2013, de 20 de setembro, pola que se aproba a Instrución do Modelo normal de Contabilidade local.



INTERVENCIÓN XERAL E XESTIÓN ECONÓMICO-FINANCEIRA

Na preparación das contas anuais, o órgano de xestión é responsábel da valoración da capacidade da entidade para continuar como empresa en funcionamento, revelando, segundo proceda, as cuestións relacionadas coa empresa en funcionamento e utilizando o principio contable de empresa en funcionamento, agás no caso de que o órgano de xestión tivese intención ou obriga legal de liquidar a entidade ou de cesar nas súas operacións, ou ben non exista outra alternativa realista.

VIII. RESPONSABILIDADE DO FUNCIONARIO AUDITOR.

Os nosos obxectivos son obter unha seguridade razoable de que as contas anuais no seu conxunto están libre de incorrección material, debida ao fraude ou ao erro, e emitir un informe de auditoría que contén a nosa opinión.

Seguridade razoable é un alto grao de seguridade, pero non garantiza que unha auditoría realizada de conformidade coa normativa reguladora da actividade de auditoría de contas vixente en España sempre detecte unha incorrección material cando existe. As incorreccións poden deberse a fraude ou erro e han de considerarse materiais se , individualmente ou de forma agregada, pode preverse razoablemente que inflúan nas decisións económicas que os usuarios toman baseándose nas contas anuais.

Como parte dunha auditoría de conformidade coa normativa reguladora da actividade de auditoría de contas vixente para o Sector público en España, aplicamos o noso xuízo profesional e mantivemos unha actitude de escepticismo profesional durante toda auditoría.



INTERVENCIÓN XERAL E XESTIÓN ECONÓMICO-FINANCEIRA

Asemade:

Identificamos e valoramos os riscos de incorrección material nas contas anuais, debida a fraude ou erro, deseñamos e aplicamos procedementos de auditoría⁸ para facer fronte a ditos riscos e obtivemos evidencia de auditoría suficiente para proporcionar un fundamento da nosa opinión. O risco de non detectar unha incorrección material debida ao fraude é mais elevado que no caso dunha incorrección material debida a erro, pois o fraude pode levar parello a colusión, falsificación, omisións deliberadas, manifestacións intencionadamente erradas ou a alusión do control interno.

- Obtivemos coñecemento do control interno⁹ relevante para a auditoría co fin de deseñar procedementos de auditoría que sexan axeitados en función das circunstancias, e non coa finalidade de expresar unha opinión sobre a eficacia do control interno da entidade.
- Avaliamos se as políticas contábeis aplicadas son axeitadas e a razoabilidade das estimacións contábeis e a correspondente información revelada polo órgano de xestión.
- Concluimos sobre se é axeitada a utilización, polo órgano de xestión, do principio contábel de empresa en funcionamento e, baseándonos na evidencia de auditoría obtida, concluimos sobre se existe ou non unha incerteza material relacionada con feitos ou con condicións que puideran xerar dúbidas significativas sobre a capacidade da entidade para continuar como empresa en funcionamento. As nosas conclusións baséanse na evidencia de auditoría obtida ata a data do noso informe de auditoría; con todo, feitos ou condicións futuros poderán ser a causa de que a entidade deixe de ser unha empresa en funcionamento.

⁸ Utilizamos fundamentalmente procedementos analíticos da información que nos foi posta a nosa disposición, conforme ao previsto na NIA-ES-SP- 1520.

⁹ O sistema de control interno foi evaluado no documento de planificación da auditoría, tendo en conta o coñecemento da entidade e a experiencia acadada na auditoría realizada sobre as contas anuais de 2019.



INTERVENCIÓN XERAL E XESTIÓN ECONÓMICO-FINANCEIRA

- Avaliamos a presentación global, a estrutura e o contido das contas anuais, incluída na información revelada, e se as contas anuais representan as transaccións e feitos subxacentes dun xeito que consiguen expresar a imaxe fiel.
- Comunicámonos coa Presidencia da entidade en relación co alcance e o momento de realizar a auditoría planificada e os elementos relevantes da auditoría, así coma sobre calquera deficiencia significativa de control interno, que temos identificado no transcurso da auditoría¹⁰.
- Entre as cuestións que foron obxecto de comunicación ao órgano de goberno da entidade, determinamos as que teñen maior importancia na auditoría do período actual e, en consecuencia, as cuestións clave de auditoría.
- A nosa opinión de auditoría sobre as contas anuais non cubre outra información extracontábel.

IX. INFORME SOBRE OUTROS REQUERIMENTOS LEGAIS E REGULAMENTARIOS.

Co alcance previsto na nosa auditoría de contas, temos revisado o cumprimento da legalidade con respecto á xestión económico-financeira da entidade durante o exercicio 2024. De dita revisión, temos observado os seguintes incumprimentos legais e regulamentarios:

¹⁰ Con tal finalidade, foi notificada o documento TDA, termos de inicio de auditoría, no momento de inicio dos traballos. Asemade, na execución dos traballos, foron comunicados mediante dilixencia estendida para o efecto, que foi cursada a través do SIR, aqueles datos ou circunstancias significativas que ían a afectar a opinión modificada contida neste informe. En síntese, procurouse cumprir co disposto na NIA-ES-SP-1260-R.



INTERVENCIÓN XERAL E XESTIÓN ECONÓMICO-FINANCEIRA

- Tense aprobado o pagamento de remuneracións por asistencias ás persoas que forman parte dos órganos colexiados da entidade, -agás ao persoal que forma parte da propia entidade-, por un importe de 5.842,50 euros, aplicados sobre a aplicación orzamentaria 912.233.00.. Sobre a procedencia destes pagamentos, non consta que dende o inicio do actual mandato 2023-2027 se teña adoptado o acordo que esixe o artigo 75.3 da Lei 7/85, de Bases de réxime local, nin polo Pleno da Deputación (que debe pronunciarse sobre a compatibilidade destas percepcións co réxime de dedicación exclusiva das persoas afectadas que ostentan o cargo de deputadas no Pleno provincial), nin por parte do pleno da propia entidade auditada.
- Na xestión dos mantementos, subministracións e servizos estase a utilizar o procedemento do contrato menor para a contratación da meirande parte das prestacións, incumpríndose o disposto no artigo 118.2 da Lei 9/2017, de contratos do sector público. Urxe, xa que logo, a tramitación de expedientes de contratación polo procedemento ordinario (artigo 131.2 da dedandita Lei), de xeito que se cumpra cos principios de publicidade, concorrència e liberdade de acceso ás licitacións que esixe dita Lei en transposición das directivas comunitarias sobre contratación pública.

Asdo. Electrónicamente por Juan Bautista Suárez Ramos.

Interventor adxunto.



INTERVENCIÓN XERAL E XESTIÓN ECONÓMICO-FINANCEIRA

DILIXENCIA DE NOTIFICACIÓN:

O presente informe emítese con carácter **DEFINITIVO e deberá notificarse á PRESIDENCIA DO CONSORCIO**, co fin de que se incorpore ao expediente de aprobación da Conta xeral do exercicio 2024 que se está a tramitar e, como anexo da mesma, se remita aos órganos de control externo, Consello de Contas de Galicia e Tribunal de Contas.

Asdo. Juan Bautista Suárez Ramos.

Interventor adxunto.



INTERVENCIÓN XERAL E XESTIÓN ECONÓMICO FINANCEIRA

ASUNTO: MEMORÁNDUM POLO QUE SE AVALÍAN AS ALEGACIÓNS PRESENTADAS POLO PRESIDENTE DO CONSORCIO CONTRA O INFORME PROVISIONAL DE AUDITORIA DE CONTAS 2024

EXPEDIENTE SUBTEL: 2025000027061

De conformidade co disposto no apartado 5.4 da nota técnica da Oficina Nacional de Auditoría (ONA) 2/2020 sobre emisión de informes provisional e definitivo de auditoría de contas anuais, emítase o presente memorando para facer constar:

O informe provisional foi emitido con data 29 de maio de 2025 e notificado ao CONSORCIO CONTRA INCENDIOS E SALVAMENTO DA PROVINCIA DA CORUÑA o día 30 de maio.

No prazo concedido ao efecto, o Presidente do Consorcio achegou o escrito de alegacións e o informe sobre dereitos pendentes de cobro correspondentes ao exercicio 2024, que se avalía nos seguintes apartados.

PRIMEIRO: ALEGACIÓNS AO FUNDAMENTO DA OPINIÓN MODIFICADA

- **Alegación primeira: Respecto do importe dos dereitos recoñecidos no concepto 319.00 do Estado de ingresos (taxa pola prestación de servizos) non reflicte adecuadamente as devindicacións producidas segundo a Ordenanza fiscal nº1.**

Non se pode estimar esta alegación xa que aínda que se explican as xestións realizadas para mellorar a xestión liquidatoria da taxa, segue a confirmarse a eiva posta de manifesto por este auditor.



INTERVENCIÓN XERAL E XESTIÓN ECONÓMICO FINANCEIRA

O mantemento da opinión modificada ten o seu fundamento na **Norma NIA-ES-SP 1450**, que trata da avaliación das incorreccións identificadas durante a realización da auditoría. Nesta Norma defínese a incorrección como a *“diferenza entre a cantidade, clasificación, presentación ou información revelada respecto dunha partida incluída nos estados financeiros e a cantidade, clasificación, presentación ou revelación da información requiridas respecto de dita partida de conformidade co marco de información financeira aplicábel.*

Na opinión do auditor han de tomarse en consideración aquelas incorreccións que afectan a imaxe fiel **en todos os aspectos materiais, non só nos formais**. Neste contexto, aceptando que na contabilidade foron recollidos todos os dereitos liquidados no exercicio, tamén ha de entenderse e mesmo se recoñece polos responsábeis da entidade auditada, que se están a producir feitos impondibles que non están a ter incidencia na contabilidade, por mor do retraso na xestión tributaria da taxa e non terse xerado as correspondentes liquidacións; isto é, a través das comprobacións realizadas e do que resulta da propia información contábel (número de actuacións que consta na Memoria) contátase que esta situación, que está a manterse no tempo e a que non se lle ten dado solución malia a ser advertida nas auditorías dos exercicios anteriores, está a desvirtuar o resultado orzamentario e económico-patrimonial de cada exercicio, derivando na dificultade engadida de non disporse de datos actualizados do coeficiente de cobertura da taxa respecto do custe unitario de cada prestación.

- **Alegación segunda: Diferenzas entre os dereitos pendentes de cobro rexistrados na Conta xeral e os valores xestionados polo Servizo de Recadación da Deputación.**

As explicacións das diferenzas entre os dereitos pendentes de cobro que figuran na conta xeral e os valores xestionados polo Servizo Provincial de Recadación, aínda que minoran as diferenzas postas de manifesto no informe provisional de auditoría,



INTERVENCIÓN XERAL E XESTIÓN ECONÓMICO FINANCEIRA

seguen a constatar que a información entre Consorcio e Deputación non está conciliada nin flúe coa celeridade esperada entre ambas as dúas institucións, entre as que existe unha evidente relación de dependencia, ao ser o Consorcio auditado un ente adscrito á Deputación.

Con todo, acéptase a alegación e danse por certos os datos que incorpora o informe emitido pola administrativo-contable do Consorcio, conformado polo Tesoureiro da Deputación e do Consorcio. Xa que logo, no informe definitivo de auditoría incorpórase o cadro-resumo de dito informe, no canto da elaborado inicialmente por este auditor.

SEGUNDO: ALEGACIÓNS AO PARÁGRAFO DE ÉNFASE E OUTRAS CUESTIÓNS

Non se poden estimar as alegacións referidas aos parágrafos de énfase e outras cuestións, xa que as mesmas veñen a confirmar as opinións manifestadas no informe provisional, no senso de que se constata a inacción para executar os créditos para investimentos, despois do incremento do importante incremento das dotacións orzamentarias para tal fin. As explicacións que se ofrecen non desvirtúan as evidencias obtidas, non alcanzando á función auditora a análise ou avaliación das causas que poideron orixinar a falla de actividade contractual.

En virtude do exposto, agás a toma en consideración da rectificación do estado de dereitos pendentes de cobro segundo o informe conformado polo Tesoureiro da Deputación e do Consorcio, en todo o demais as alegacións quedan desestimadas.

Juan Bautista Suárez Ramos.

Interventor adxunto.

Conforme,

O interventor xeral

José Manuel Pardellas Rivera